

緣督廬日記鈔

葉昌熾

撰

王季烈

編

②

第二冊目錄

卷五	光緒十四年至十五年（一八八八——一八八九）	一
卷六	光緒十六年至十九年（一八九〇——一八九三）	一四三
卷七	光緒二十年至二十四年（一八九四——八九八）	二七九
卷八	光緒二十五年至二十六年（一八九九——九〇〇）	四四三

緣督廬日記鈔卷五

光緒戊子至
己丑凡二年

長洲葉昌熾著

邑後學王季子

戊子正月

元旦客來賀節皆拒未見獨生訟過行年四十而蹉跎玩愒百
事無成愧何如之

初二日讀梅村贈陸生詩古來權要嗜奔走巧借高賢謝多口
古來貧賤難自持一餐誤喪平生守其言可謂沈痛

初五日得渭漁書知潮州府志將議開辦其意欲余圖此一席
故人之意良厚余倦游矣雖有精餌不上竿矣

初十日作齊魯近正錄序代卽亭也

十二日翰臣招游半塘先至彭園次游陳園水木明瑟亭館玲
瓏此間勝區也潘氏海山仙館卽在彭園對岸歌榭舞臺鞠

為茂草惟存荔子數百樹為園丁利藪俯仰陳迹不勝滄桑
之感歸舟復至花地畧一徘徊即返棹同游者鄒子建東嚴
子子湛吳子問潮皆同鄉也

十三日讀梅村詩以自遣故君故國之感溢乎言表昔人以桃
花夫人為況得其平矣

十九日讀元城語錄題左朝散郎主管江州太平觀賜緋魚袋
馬永卿編後學文林郎魏縣知縣區龍禎重校梓魏縣儒學
教諭王惟新同校

廿三日題華筵秋畫二絕師許所屬也

二月

初五日讀牧齋投筆詩以此欺天下後世亦不自諒矣梅村洵
不可及

初九日得岷懷書知操致遺文業已編定約百餘首送王學使
刻入經解續編又云芾卿聘其孤女為子婦叔壬居憂長齋
奉佛益不預世事

初十日學使赴肇慶按試諸君皆橐筆以隨僕倦游矣請於學
使得遂言旋之願自今以後當杜門謝客願為溝中瘠不願
仰此等人眉睫也

十二日薄暮偕韓丈造撫署辭行中丞見貽唐經幢十餘種王
勝之孝廉見貽彝器拓本數十種尹伯淵贈冒巢民書畫研
拓本研背刻陳老蓮所繪巢民小像南皮所藏也中丞見示
玉造象一龕劉達夫妻為其女磨子造

十七日午後中丞派克虜小火船送至黃埔登廣利輪船

十九日夜展輪

二十日巳刻到香港聞夷人征煙稅譏察甚嚴因不登岸

廿一日夜戌時開出口

廿五日早晨過甯波酉時抵上海住天保棧

廿七日金玉山招復新園即託其僱一舟席散下船

廿八日早晨開船

三月

初一日午刻抵里

初八日至叔士家暢談哭操致之靈既慟故人又自幸其得歸也

初十日許勉夫來談方輯蔡氏月令將為疏證暮香生來云新得宋刻殘本酉陽雜俎又顧刻漢隸字源屬撰札記

十二日夜讀蘇詩宋高邱所刻施元之注為邵青門刪補全非

吳興真面安得宋本復出重刊行之

十三日為香生校漢隸字源先以陸子傳影宋本校毛本陸本
後有題字云嘉靖壬子十一月陸師道手錄奉衡山老先生
賜覽碩宋樓物也

十四日見詵兒所作君子遠庖廚論虛字尚無扞格而說理不
甚明造叔彥齋見所作禮服釋疑稿又欲撰經儒法則編斷
自孔子世家始次仲尼弟子列傳次孟荀列傳漢以下經師
嘉言懿行無不登焉又見婁縣張錫恭門遠所著讀士禮注
疏日記

十五日夜讀蘇詩校漢隸字源盡上平聲五支

十六日校字源六脂

十七日燈下作釋鐙一首以說文豆部彘字為禮器金部鐙字

為膏鏐與段君之說不合

十八日得詩孫丈書知粵中無日不雨子樅羅定畢後決計言旋又得芍溪函寄贈風峪石經二紙又知余好古泉欲得大歷建中孝建四銖諸異品拓本

十九日從康吉借張緯餘仰蕭樓文集讀之緯餘名星鑑老於學幕在皖中殷侍郎幕時為同幕揚建昭作傳後繫以論曰余客他鄉時時作一死境觀蓋所遇之人無一可以寄死生者不作死境更不得生也甚矣依人之難也其言沈痛非閱歷有得者不能言也吾思操數能無實涕

二十日至漢貞閣攜歸靜明勸化邑義垣周等造象銘其石在登封縣後周天保八年造又隋宋文彪等造澧水石橋碑在南和縣孫氏皆著錄又造綠潤堂見陳文恭刻傳家集索直

十二元為周師作輓聯其詞曰杖履溯平生豈堪粵嶠歸來
正值師門悲薤露絃歌留遺愛不僅秦郵多士相從橫舍奠
椒漿

廿一日印若得蔣仰韓處拓本二紙見貽一為明永昌衛指揮
使司夜巡牌一唐鏡上刻七絕一首曰月樣團圓水樣清好
將香閣伴吟身青鸞不用羞孤影開匣當如見故人

廿三日唐仁齋來見示宋乾德重修中岳廟記駱文蔚書

廿五日唐仁齋送來晉漂陽侯史公廟碑永和八年十三代孫
甯朔將軍中郎將援重立諸家金石從未著錄據仁齋云錫
山秦荳風先生至漂陽史氏祠中訪得之余審其文不似東
晉人所為字亦平近甚可疑也又魏武定八年穆子容脩太
公廟碑魏皇甫驎墓志徂徠山摩崖佛經宋元祐黨人碑各

一通黨人碑有二石一在融縣者額正書一在臨桂者額隸書此臨桂本也

廿八日感尊告余云貧士能耐貧頤指氣使則不耐也真知我三十日昨從漢貞閣攜歸太僕卿元公及夫人姬氏墓志石唐邨題字今日新吾以唐開業寺碑解慧寺門樓贊見貽

四月

初二日至漢貞閣攜歸唐墓志數種一為尼清真塔銘沙門季良撰一為朝議郎行尚書祠部員外郎裴君墓志銘族叔禮部員外郎肱撰兼書一為大慈恩寺大法師甚公塔銘朝散大夫檢校太子左庶子使持節金州諸軍事守金州刺史兼御史中丞輕車都尉賜紫金魚袋李弘慶撰一為試大理司直辛公墓誌銘姑射處士睦口撰一為朝議郎前行宣州南

陵縣尉柱國張府君墓誌銘朝議郎前使持節藤州諸軍事
前守藤州刺史上柱國賜緋魚袋蔡德章撰

初三日得此懷書見貽隋元公及姬夫人墓志仁齋不復能居
奇矣又得詩孫丈書云憲齋新設通志採訪局欲以金石見
屬如憲公之開誠布公非不願往也奈夫已氏何

初四日西圃師招飲庭中佛香盛開此花一名婆羅來自西域
齋戒而後可種加以不潔之物頃刻可萎西圃師又言江陰
吳冠英丈夫婦八十齊眉一老妾年六七十餘貧病交迫至
自憾不早逝名士下場頭可為浩歎

十一日得芍溪書以江陰吳冠英丈所藏心經幢拓本見贈此
幢造於開元廿八年四月張晏撰序書人名已泐舊聞之唐
仁齋云六舟和尚舊物芍翁述冠老之言云得之江陰敗廟

言
中非得自六舟也又云冠老龍鍾無心於此欲舉以相贈苟
翁以為暨陽故物堅拒未納

十二日訪許勉夫居委巷之中陋室一椽課蒙童四五自給出
示趙凡夫皇明世典稿本佚存五十餘冊面葉題字皆凡夫
先生手筆每葉板心寒山草三篆字亦其書也凡例已刻據
所述分徵應編創業編垂統編然徵應編首卷又題十之一
則似不僅此三類全書尚未分卷攷此書郡志不著錄惟寒
山志凡夫自敘云皇明世典中三重事一靖難二復辟三大
禮筆不能題淚不堪灑人生至此幾不欲生收攬前後作者
並存不削亦不言其體例如何明人撰述陵雜無序往往如
此勉夫云舊為查氏得樹樓所藏歸後綏之來談亦極口勉
夫之刻苦非人所能及

十三日得叔朋書以許學叢書見貽共刊三集皆數見不鮮之本

十四日訪岷懷共讀操菽遺文又出示趙文敏書酒德頌卷子平津館舊藏岷懷得之長沙周氏有淵如跋三則覃溪三則段若膺桂未谷皆有看款又見南田花艸卷黃小松為桂未谷畫小屏四幅王烟客畫山水尺頁九幅內有洞庭兩山圖岷懷說為希有之品又見出售書目一紙出自操菽家洵美先生所校釋文集韻亦在其中見之腹痛

十五日碩庭云伯淵藏有唐石數種又有一小石幢云皆校邠師所遺然余假館靈巖時未嘗見也豈當時無心於此故熟視無覩耶

十六日訪鍾子靖見宣和畫鷹有明宣德御題又有鄭元祐張

渥題字子靖云是偽筆細審無飛動之致其言良是得此懷書以郡齋讀書志見貽王益吾祭酒校刻本也

十七日從鍾子靖處借杭州府志一部閱之乾隆四十三年原修總裁知府邵齋然總修汪沆王增邵晉涵四十九年續修總裁知府鄭澐總修邵晉涵其書體例未善攷證尤多疏舛文苑王之獻伯珍一人兩傳相隔不過二葉金石藝文皆僅錄舊文不言存佚吾不知屬稿時二雲先生曾否寓目也

十八日得碩庭書屬題歸研圖卷子伯淵來云在京曾從陳培之農部借沈小宛手校水經注傳錄香生欲借刻

廿一日從伯淵處借到石幢雍匡祚造但書大宋歲壬午而無紀年字不甚精

廿二日訪唐仁齋得射陽石門畫像攜歸鑰推自拓石幢一本

廿四日得鄭盦丈書知仲午丁艱

廿五日讀申季遺稿皆書院課藝存之雖非操觚本意亦慰情聊勝無而已

廿六日屺懷叔彥偕來暢談叔彥讀凌次仲校禮堂集黃鐘攷尊崇西學有西方有聖人一語憤不能平為之廢寢屺懷作釋人疏證已脫稿又欲作漢碑引經攷得鳳石書屬撰劉孝子徵詩啟

廿七日訪香生與言刻漢隸字源體例格不相入因慙慙先刻論衡偶檢鈕匪石遺文有校禮堂集書後譏其操戈於宋學而以尊歐洲天算為持平與叔彥各明一義皆凌氏之諍友也

廿九日培卿丈拓得造象一區經幢兩座一下截已失僅有乾

符六年四字略可辨經文亦模糊一斷為三截有建幢記云
為亡考二郎於其墳所建立花幢又云十一月廿日記其紀
元及建幢人姓名則已佚矣撰人為義林失其姓所存字行
書頗工有懷仁聖教遺意皆憲齋丈從關中携歸者也

三十日得熙年書云有人持新野縣經幢求售會昌二年九月
僧契元書不知此包山幢也云新野者市人炫售之技耳

五月

初九日得岷懷函為余購定汪刻儀禮單疏一部直泰餅
初十日訪印若出示高澹游浮嵐暖翠畫卷

十二日在翼甫處見海昌蔣肖鰭茂才寅昉先生之子也見贈
唐朱陽墓志拓本海甯新出土文云公諱陽字正中杭州鹽
官縣人也以永貞元年九月廿四日終於此邑長平鄉之私